

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- चुनां आयोग नै जम्मू कश्मीर च आँदे विधानसभा चुनां च प्रिंट, इलैक्ट्रानिक्स ते सोशल मीडिया ताई दिशा-निर्देश जारी कीते न। मतदान मुकम्मल होने थमां 48 घँटे पैहले तगर कुसै चाल्ली दी बी चुनावी सामग्री दे प्रदर्शन पर बंदश लाई ऐ।
- भारतीय जनता पार्टी ते कांग्रेस नै जम्मू कश्मीर च आँदे विधानसभा चुनां लेई अपने-अपने मेदवारें दी अगली सूचि जारी कीती।
- केन्द्री मंत्री डॉ. जितेन्द्र सिंह होर जम्मू कश्मीर च चुनां गी लोकतांत्रिक आसं मेदें लेई मील दा पत्थर दस्सेआ।
- उपराज्यपाल मनोज सिन्हा होरें श्री माता वैष्णो देवी यात्रा पर दऊं यात्रुएं दी मौत पर बसोस प्रगट कीता ऐ।

<><><><><><>

ECI Guidelines

चुनावी प्रक्रिया दी पवित्रताबनाई रखने आस्तै भारती चुनां आयोग नै जम्मू कश्मीर विधानसभा चुनां 2024 थमां पैहले प्रिंट, इलैक्ट्रानिक्स ते सोशल मीडिया आस्तै बक्ख-बक्ख चाल्ली दे दिशा-निर्देश जारी कीते न। भारतीय चुनां आयोग नै जनप्रतिनिधित्व अधिनियम 1951 दी दफा 126(1)बी च दित्ते गेदे दिशा निर्देशें गी फही दोहराया जेहड़े चुनां आले क्षेत्रें च कुसै बी चुनां आस्तै मतदान दे खत्म होने दे तैह समें दे खत्म होने आली 48 घँटे दी अवधि दरान कुसै बी मतदान क्षेत्र च टीवी, चल चित्र जां इस चाल्ली दे उपकरणें राएं कुसै बी चुनां सरबंधी समग्री गी प्रदर्शित करने पर पाबंदी लांदा ऐ। 48 घँटे दी इस अवधि दरान टीवी, केबन नेटवर्क, रेडियो जां सिनेमा हॉल च कुसै बी चुनावी मामले पर राजनीतिक इश्तेयार इक्कै बारी मते सारे एसएमएस, वायस मैसेज दे इस्तेमाल ते कुसै बी क्षेत्र च ऑडियो-पियुअल डिसप्ले पर बी पाबंदी रौहग। इंटरनेट वैबसाइट ते सोशल मीडिया मंचें पर सारी राजनीति समग्री आस्तै इत्थुआं तगर जे इलैक्ट्रानिक्स मीडिया पर राजनीतिक इश्तेयारें ते मशहूरिएं लेई यूटी-सतह ते जिला सतह पर कायम समितिएं आस्सेआ पैहले गै प्रमाणपत्र लैना लाजमी होग।

आयोग नै एह बी सूचित कीता ऐ जे कोई बी राजनीतिक दल जां फही मेदवार जां कोई होर संगठन जां व्यक्ति मतदान आले दिन जां फही मतदान दे इक दिन पैहले प्रिंट मीडिया च कोई बी विज्ञापन प्रकाशत नेई करोग। जिसलै तगर ओह राजनीतिक विज्ञापनें दी सामग्री बारे एमसीएमसी समिति थमां पैहले गै मंजूरी नेई लेई लैँदा। जम्मू कश्मीर विधानसभा चुनां 18 सितम्बर 2024 थमां पूरे केन्द्र शासत प्रदेश च त्रै चरणे च शुरू होआ'रदे न।

<><><><><><>

BJP & Congress

बीजेपी नै ओँदे विधानसभा चुनाएं लेई अपने मेदवारें दी चौथी सूचि जारी कीती ऐ, जिंदे च पार्टी दे केन्द्र शासत प्रदेश अध्यक्ष रविन्द्र रैणा होरें गी जम्मू संभाग दे नौशहरा विधानसभा हल्के थमां मेदवार बनाया गेआ ऐ। जारी कीती गेदी इस नमीं लिस्ट कन्नै बीजेपी नै अजे तगर 51 मेदवारें दा ऐलान करी दित्ता ऐ, जिंदे च कश्मीर घाटी ताई 14 मेदवार शामिल न। इत्थें पार्टी नै अजे अपना खाता खोलना ऐ। 2014 दे चुनाएं दरान नौशेहरा थमां जित्त हासल करने आले रविन्द्र रैणा होरें गी अपने गृह निर्वाचन हल्के थमां तोआरेआ गेआ ऐ। कांग्रेस नै बी अपने मेदवारें दी दूई सूचि जारी कीती ऐ। एहदे च 6 दावेदारें दे नां शामिल न, जिंदे च जेकेपीसीसी अध्यक्ष तारिक हमीद कर्रा बी ऐन। ओह सेंट्रल शाल्टेंग थमां चुनां लड़गंन। मेदवारें दे नाएं दी घोषणा कांग्रेस दी केन्द्री चुनां समिति दी बैठक दे तुरत मगरा कीती गई। कांग्रेस ते नैशनल कांफ्रेंस रलियै चुनां लड़ा करदे न। जारी कीती गेदी लिस्टें च रियासी विधानसभा हल्के थमां मुमताज खान ते माता वैष्णो देवी निर्वाचन क्षेत्र ताई भूपेन्द्र जम्वाल हुंदे नां दी घोषणा कीती गई ऐ।

<><><><><><>

Jatinder Singh

भाजपा लीडर ते केन्द्री मंत्री डॉ. जितेन्द्र सिंह होरें जम्मू कश्मीर च चुनाएं गी लोकतांत्रिक आसें—मेदें दा मील दा पत्थर दस्सेआ ऐ। कल नमीं दिल्ली च इक प्रेस कांफ्रेंस गी संबोधत करदे होई डॉ. सिंह होरें केन्द्र शासत प्रदेश दे स्वशासन, बाद्धे विकास ते सशक्तिकरण आले दृष्टिकोण गी सांझा कीता। उनें गलाया जे चुनां ऐतिहासक न की जे जम्मू कश्मीर च इक दाहके मगरा विधानसभा चुनां होन जा करदे न। केन्द्री मंत्री होरें बिजन जेएंडके @ 2047 बी पेश कीता ते आखेआ जे डबल इंजन सरकार इस बिजन दा अनट्रुट हिस्सा होग। उनें मेद प्रगट कीती ऐ जे डबल इंजन सरकार इत्थें विकास दे नमें भित्त खोलग। डॉ. सिंह होरें दफा 370 दे हटाने गी जम्मू कश्मीर दे बदलाव च इक महत्त्वै आली गैह दस्सेआ।

<><><><><><>

Udhampur SVEEP

ओंदे विधानसभा चुनाएं गी ध्यानै च रखदे होई मतदाताएं गी जागरूक बनाने ते उंदी हिस्सेदारी गी बधाने दे मकसद कन्ने जिला चुनां अधिकारी दधमनी सलोनी राय होरें कल डीसी दफतर उधमपुर च मिनी कांफ्रेंस हाल च वोट पाने लेई प्रेरित करने आला इक डोगरी स्वीप गीत जारी कीता। रिटर्निंग अफसर 62—रामनगर रफीक अहमद जराल हुंदे पास्सेआ रचे गेदा एह गीत मतदाताएं गी वोट पाने लेई प्रेरित करदा ऐ। जिला चुनां अधिकारी सलोनी राय होरें इस पैहल दी सराहना कीती। आकाशवाणी कन्नै गल्ल करदे होई उनें आखेआ.....
.बाईट

<><><><><><>

DEO Samba

सांबा दे जिला चुनां अधिकारी राजेश शर्मा होरें कल अफसरें कन्नै लग्गी दी इक बैठक दरान सब्बै मतदान केन्द्रें पर घट्टोघट्ट सहूलतें गी जकीनी बनाने पर गल्लबात कीती गई। श्री शर्मा होरें सरबंघत रिटर्निंग अफसरें ते घट्टोघट्ट सहूलतें गी जकीनी बनाने आले एएमएफ दे नोडल अधिकारिएं गी इस गल्ला गी जकीनी बनाने दे निर्देश दित्ते जे वोट पाने आले ध्याड़े शा पैहले पैहले सब्बै लोडचदियां सुविधां हरेक मतदान केन्द्र पर उपलब्ध होनी लोडचदियां। एहदे इलावा टकोहदे मतदान केन्द्र स्थपात कीते जांगन, जिंदे च महिला, दिव्यांग, नोजवान आस्सेआ चलाए जाने आले पर्यावरण अनुकूल ग्रीन, नूठ ते आदर्श मतदान केन्द्र शामिल होंगन।

<><><><><><>

DEO Poonch

पुंछ दे जिला चुनां अधिकारी विकास कुंडल होरें ओंदे विधानसभा चुनाएं लेई चला'रदिएं तैआरिएं तैहत कब्जा रेखा कश स्थित मतदान केन्द्रें दा कल व्यापक दौरा लाया। श्री कुंडल होरें नेकें स्कूलें दा निरीक्षण कीता जित्थें मतदान केन्द्र बनाए गेदे न। उनें उत्थें उपलब्ध बुनियादी सहूलतें दा जायजा लैता। एहदे अलावा वरिष्ठ नागरिकें ते दिव्यांगें लेई बौहने दी बवस्था ते मर्दे—महिलाएं आस्तै बक्खरी बक्खरी रींगा जकीनी बनाने पर टकोहदा ध्यान दित्ता गेआ। जिला चुनां अधिकारी होरें इनें थाहरें पर सुरक्षा बवस्था ते बंकरें दी स्थिति दी बी समीक्षा कीता।

<><><><><><>

Landslide

माता वैष्णो देवी यात्रा दे रस्ते पर पंछी हैलीपैड दे नेड़े लास पस्सियां पौने करी 2 महिला श्रद्धालुएं दी मौत होई गई ते इक नाबालिक कुड़ी गंभीर तौर पर घायल होई गई। एह हादसा उसलै पेश आया जिसलै पहाड़ें परा कुप्पड़ हेठ पेई गे जेहदे चलदे इक महिला दी मौके पर गै मौत होई ऐ। 2 होर गंभीर तौर पर जख्मी होई गे। मगरा जख्में दी ताह् नेई जरदे होई इक महिला नै दम त्रोड़ी दित्ता ते नागालिक कुड़ी दा इसले अस्पताल च इलाज चला'रदा ऐ। उपराज्यपाल मनोज सिन्हा होरें श्रद्धालुएं दी मौती पर दुख ते बसोस प्रगट कीता ऐ। उनें मारे गेदे लोकें दे नेड़में रिश्तेदारें लेई 5-5 लक्ख रुपें दी सिद्धी सहायता दी घोषणा कीती ऐ।

<><><><><><>

PM Modi

प्रधानमंत्री नरेन्द्र मोदी होरें विश्वास जाहर कीता ऐ जे ब्रुनेई ते सिंगापुर दी उंदी यात्रा कन्ने दौनें मुल्खें कन्ने ते बड़डे आसियान क्षेत्र च भारत दी सांझेदारी होर मजबूत होग। दौनें मुल्खें दी यात्रा पर रवाना होने थमां पैहले अपने ब्याने च मोदी होरें आखेआ जे भारत दी एक्ट इस्ट नीति ते हिंद प्रशांत नजरियै दे मामले च दवै मुख्य महत्वपूर्ण सांझेदार न। प्रधानमंत्री होरें आखेआ जे ओह ब्रुनेई दारे सलाम दी पैहली दपक्खी यात्रा पर रवाना होआ'रदे न। उनें आखेआ जे ओह ब्रुनेई थमां सिंगापुर जांगन। उत्थें मोदी होर व्यापारिक समुदाय दे दिग्गजें कन्ने मलाटी करगंन।

<><><><><><>

Agriculture Minister

केन्द्री कृषि, करसान कल्याण सरबंधी मंत्री शिवराज सिंह चौहान होर अज्ज भारतीय कृषि शोध संस्थान नमीं दिल्ली च एग्री SURE कोष ते कृषि निवेश पोर्ट दी शुरूआत करगंन। इस मौके ओह बक्ख-बक्ख श्रेणिएं तैहत् बेहतरिन कारकरदगी आले बैंकें ते राज्यें गी एआईएफ उत्कृष्टता पुरस्कार बी भेंट करगंन। इस मौके केन्द्री राज्य मंत्री ते बक्ख-बक्ख राज्य ते बैंके दे नुमायंदे बी शामिल होंगन। मंत्रालय नै आखेआ ऐ जे एह समारोह होने बैंकें गी बी बेहतर कारकरदगी लेई प्रोत्साहित करोग।

<><><><><><>

Chief Secretary JKRLM

मुख्य सचिव अटल डुल्लू होरें जम्मू कश्मीर ग्रामीण आजीविका मिशन दी कार्यकारी परिषद दी 8मीं बैठक दरान स्कीमें दी अमलावरी ते महत्वपूर्ण मुद्दें पर चर्चा होई। मुख्य सचिव होरें आप सहायता समूह गी शामिल करने, उनें गी लोडचदी सहायता उपलब्ध करोआने ते कम्म रोजगार पैदा करने च मदद लेई गलाया। उनें आखेआ जे जेकेआरएलएम इक तैआर, पूरा पराता सरिस्ता ऐ। उनें आखेआ जे एह इक बड्डा मंच ऐ ते अपने उपलब्ध संसाधनें दा इस्तेमाल करदे होई एहदे थमां बद्धोबद्ध लाह ठोआना लोडचदा। उनें सरबंधी मैहकमे कन्नै रलियै कम्म करने लेई गलाया।

<><><><><><>

SVEEP Rafting Reasi

मतदाताएं गी जागरूक करने ते चुनाएं च उदी हिस्सेदारी गी बधाने दे मकसदकन्ने रियासी दे जिला चुनां अधिकारी विशेष महाजन हुंदी रहनुमाई च स्वीप कार्यक्रम दे इक हिस्से दे तौरा पर राफिटिंग दा सरिस्ता कीता गेआ। इस कार्यक्रम दा मकासद नोजवानें कन्नै जुड़ियै उनेंगी चुनाएं च मतदान लेई प्रेरित करना हा। डीईओ विशेष महाजन होरें हरेक वोट दे महत्व गी दोहराया ते नोजवानें गी अपने लोकतांत्रिक हक दी जिम्मेदारी कन्नै इस्तेमाल करने दी अपील कीती। उनें गलाया जे इस चाल्ली दे कार्यक्रम च छड़ा वोटरें गी जागरूक बनांदे न सगुआं हिस्सा लैने आलें च दिलेरी ते आपसी भाईचारे दी भावना गी बी बघांदे न।

<><><><><><>